



Lescha d'energia dalla vischnaunca Illanz/Glion (Lescha d'energia; LEn)

Dils 11 da settember 2024 (versiun dils x da *meins* 2025)

Il parlament communal dad Illanz/Glion,

sebasond sin art. 8 dalla lescha d'energia dil cantun Grischun (LEG; DG 820.200), suenter envesta el messadi dalla suprastanza communal dils 25 da zercladur 2024,

decida:

I. Disposiziuns generalas

Art. 1 Object ed intent

¹ Questa lescha reglescha l'activitad e las cumpetenzas dalla vischnaunca el rom da sia politica d'energia. Ella reglescha la taxa che sto vegnir furnida dallas gestiunarias resp. dils gestiunaris dalla reit per l'utilisaziun dil terren sco era l'utilisaziun dils imports fixai e promova in'utilisaziun d'energia ella vischnaunca ch'ei conforma agl ambient e spargnusa. En quei connex eis ei da dar peisa alla promoziun da fontaunas d'energia regenerablas.

² Questa lescha ha igl intent da realisar ina politica d'energia persistente sin basa dil model directiv communal d'energia.

II. Organisaziun

Art. 2 Cumissiun d'energia

¹ La suprastanza communal elegia ina cumissiun d'energia che secumpona da tschun commembras e commembers. Da quella fa silmeins ina commembra ni in commember dil parlament communal part.

² La suprastanza communal fa stem dad ina cumposiziun equilibrada dalla cumissiun pertuccont la savida dil fatg.

³ La cumissiun d'energia seconstituescha sezza.

⁴ La perioda d'uffeci dallas commembras e dils commembers dalla cumissiun munta a 4 onns e treis periodas d'uffeci ein pusseivlas.

⁵ Il commember dalla suprastonza communal ch'ei responsabels per l'energia fa part dalla cumissiun d'energia.

⁶ Il menader planisaziun e construcziun fa part dalla cumissiun d'energia senza dretg da votar.

III. Finanziaziun

Art. 3 Procuraziun da mieds finansials

¹ Per l'utilisaziun speciala da terren public per la construcziun ed il menaschi dalla reit da distribuziun electrica paga il gestiunari dalla reit ina taxa alla vischnaunca.

² La taxa vegn calculada sin basa dalla quantidad d'energia spisgentada dalla reit da distribuziun multiplicau cun ina tariffa da 0.5 entochen 2.0 raps per ura da kilowatt (kWh). La suprastonza communal fixescha l'altezia dalla taxa.

³ Il gestiunari dalla reit ha il dretg d'adossar quella taxa als consumers finals. En quei cass sto el cumprovar la taxa en il quen als consumers finals separadamein tenor las disposiziuns dil dretg federal vertentas.

Art. 4 Utilisaziun dils mieds

¹ Maximalmein 50 pertschien dallas entradas dalla taxa vegnan attribuidas al preventiv communal ordinari. Decisivs ei il preventiv respectiv.

² Cun ils mieds dalla taxa finanziescha la vischnaunca projects che vegnan iniziati dalla vischnaunca per ses agens menaschis, sias atgnas immobilias ni activitads. Quei san esser:

- a. edifecis e stabiliments per gudignar energias regenerablas;
- b. sanaziuns d'edifecis e da stabiliments dalla tecnica da casa sch'ins contonscha aschia in pli pign basegn d'energia ni in meglier grad d'utilisaziun;
- c. implonts da pilot e da demonstraziun per energias regenerablas;
- d. traffic public;
- e. activitads ord il catalog da mesiras marcau d'energia;
- f. participaziun a projects privats cun caracter comunizeivel.

³ Ils mieds finansials buc utilisai vegnan assignai ad in fond d'energia che sedrezza ad in intent communal, vegn administraus dalla suprastanza communal e che sto vegnir utilisaus da principi en il senn dalla lescha presenta.

IV. Disposiziuns penalas e finalas

Art. 5 Disposiziuns penalas

¹ Tgi che cunterfa a quella lescha, all'ordinaziun ed allas disposiziuns e decisiuns che sebasan sin quellas, vegn punius dalla suprastanza communal cun ina multa da tochen 5'000 francs. El cass da repetiziun sa la multa vegnir dublegiada.

² En cass da cuntravenziuns che han consequenzas per persunas giuridicas, vegn la persuna giuridica punida. La puniziun dils organs ni dils representants che ageschan resta explicitamein resalvada.

Art. 6 Ordinaziun

¹ Per l'execuziun da questa lescha relai la suprastanza communal in'ordinaziun.

Art. 7 Entrada en vigur

¹ La lescha presenta ei suttamessa al referendum facultativ.

² La suprastanza communal decida il termin d'entrada en vigur da questa lescha.¹⁾

³ Cun l'entrada en vigur da questa lescha ein las disposiziuns d'auters decrets che stattan en contradicziun cun ella abrogadas.

¹⁾ Mess en vigur sigl xx-xx-2025 cun conclus dalla suprastanza communal dils xx-xx-2024.

75.2

Vischnaunca Ilanz/Glion

Tabella dallas modificaziuns - tenor conclus

Conclus	Entrada en vigur	Element	Modificaziun	Publicaziun CRS
11-09-2024	01-01-2025	relasch	emprema versiun	-

Tabella dallas modificaziuns - tenor element

Element	Conclus	Entrada en vigur	Modificaziun	Publicaziun CRS
relasch	11-09-2024	01-01-2025	emprema versiun	-